

ጳውሎስ ፍልጽሰዩስ መኒሃ ከተቦ ሶህኑተ ኣጉስ

ጳውሎስ ከ ሶህኑተ ከተቦሁ መቄዶንያ ዩኖ ሮሞ መንግሥት ገሸ ኣዜን ዮ ፍልጽሰዩሳን ሄኣ መገን አመዕናኖ ዱእ ሞኒሃት፤ ሁኩ ዱእ ሞኑ ጳውሎስ አውሮፕ ባዶን ዋዕናሃ ኡርሾእታን፤ ሶህኑስ ከተበንቶኢሁ ጳውሎስ ኡሱር ሞኔን ሄዕዮ ወክት ዋሎ አመዕናኖን ግበሙ ኢሌስ ወክትለከ ፍልጽሰዩስ መገን አመዕናኖ ዱእ ሞነ በላን ኬዕዮ ክዝብ ትምርት መሳን ቀልቡስ አበ ሻዡ ወክትዪት። እሁን ቤሉ ጳውሎስ መሲህ ኢሳን ዮሲ አመዕነቱ አበ እኮቤቺሃ ከን ሶህናን በትሽ ለለኖሁ ሙንዲኖተለከ ዊመ አመዕነቱ።

ጳውሎስ ከ ሶህኑተ ከተቦ ዋኔ መስት ኦርሽስ ወክት ሽልማት ሶኮሲሃ እኮቤቺሃ ፍልጽሰዩስ አመዕናኑት ገለትጮታት፤ እስለከ እስ አሌን አደዱ ኦርሽት ኢልቶሳሃ እኮጎሬ መለሉለከ ዊሙ አመዕነቱ ሄኣስተ ከን ገንባቲን ጠረኝሰኖስ። ቦኑ አጉርት መሲህ ኢሰገ ገወ ሆፍሳረ እኮተ አበ ቃግሰኖስ፤ መሲህ ኢስ አያኒን ሜጡበ እሂን ደእቶ ሄኡ መገን ኣሰቶች አሜቸኢሃለከ አመዕነቲን ደእቶእሃ ቤሉ ሕገ አገሪን ደገሞእሃበእ ዮን ቃግሰኖስ፤ መሲህ ኢሲን ሜጡበ እክ ሄኣሁኑኡ ጉዕሚንከ መገኑ ኣሰኖስ ወገሬትለከ ሙንዲኑተ ከተበኖስ።

ኩ ሶህኑት ደገንታኢሁ ሙንዲኑተ፥ አመዕነሙ፥ ሜጡበ እሁለከ አመዕነት ሄኢን ጠረኙ በትሽ ለሊሶንከሲት፤ በርግን አሳቤቹ ጳውሎስ ፍልጽሰዩስ መገን አመዕናኖ ዱእ ሞኒሃ ዮስ አበ ኢተተ ለሊሰኖ።

መጻፉስ አፎሃ

ኣጉስ (1፡1-11)

ጳውሎሴሃ ሀለኸሰ ሀለት (1፡12-26)

አመዕነት ሄኣ ሞሳልተ (1፡27—2፡18)

ጢሞትዋሴለከ ኤጳፍሮዲቱሲሃ ያደተ (2፡19-30)

አመዕነቱ ግባሁኑኡሃ ኩለሞስ ጠረኻ ጠወ (3፡1—4፡9)

ጳውሎስ ፍልጽሰዩስ አመዕናኖተ ሆንጠህሾ ገለትለከ ሽዘነተ (4፡10-20)

መጨረሻስ (4፡21-23)

1 ኩ ሶህኑት መሲህ ኢሰ ካዲመተ እኮ ጳውሎስቶላክ ጥማቶሴች ሶህንቶእተ ሶህኑ፤ ሶሃሞንኩ «ፍልጽሰዩስ» ዬኖ ከተማን ሄኣ አመዕናኖ ጭምት አዎንሳኖሃ፡ ድያቆናከተለክ * መሲህ ኢሳን አመዕንት ጠሊላኑተ እኮሀኑኡሃ ጉዕሚንካት።

2 እናኔ መገኒቺ ቀርቼሃኔ መሲህ ኢሲች ኣሰቱትለክ ወገሬቱ ክዕኔሃ እሁን።

ጳውሎስ ገለት ዱኣ

3 እን ክዕኔተ ቃጋሞ ወክት ጉዕመንከ መገኑኤ ገለትጫሚት።

4 እን ክዕኔተኔሃ ዱኣ አኣሞ ወክት ጉዕመንከ ሙንዲኖን ዱኣ አኣሚት።

5 ወዕኔ በሬች ጀመር ከበሬ ኢላ ተሸት ላገተ ኢን ሜጡበ እኬን አቲንተቤቺሃ መገኑ ገለትጫሞ።

6 ከ ጡመ ሆጉተ ክዕኔን አኣተ ጀመር መገኑ መሲህ ኢሰ አሜተኖ በር ቩሎተ ኢላ አገረኖገ አመዕናሞ።

7 ቱሱ ኡሱር ሞኔን ዮሞ ወክትለክ ኡሱረሞችኤ ብርተ እንጂል ሀንቂሃ ከዕመቀሞተለክ እሱንከ ጠረኝሲሃ አኣሞ ወክት መገኑ ኣሰቶንከሰ ኣሴኤ ዕድሊን ጉዕመንኩክዕኔ ቤቀማኑተ እኬንተቤቺሃ አዕኑ ጉዕመ ወክት ቀልቤንከኤ ዮንተ። ህካን እኮቤቺሃ ክዕኔተኔሃ ሞጮጨመኖኤሁ ሀንቀሃን።

8 መሲህ ኢሰ ኢታን ጉዕመንከክዕኔ ሄንከ ሱናሚት ጎሬ መገኑ ደገኖ።

9 ኢተክዕኔ ኤንኬዕኑለክ ሀይመተ ሰውዩ ዊሞሀ እክ ነጸን መረኖገ ዱኣ አኣሞ።

10 እሰን ጡመ ጠወ አጥራመቲን ደጎኖተለክ መሲህ ፈንቀል አሜተኖ በር ነጣኑተለክ ሙልሲሰኖ ጠወ ዮህዕኔበእረ እኬን ደገንቶኖታት።

11 ህትን መሲህ ኢሲን ደገመኖ ፈይመ ላልቺን ዊንቲን መገኒሃ ኬዕምኣለክ ገለት ደግሲሴነንታሃ እኬነንተ።

ጳውሎስ ኡሱረሙ እንጂሉ አልባዕሎተ መሰተ እሁሰ

12 አመኤ ኦሶ! ኢ አሌን ኢሌ ጠወ ጉዕመንኩ እንጂሉ አበ አልባዕላኖገ አኡሰ ደጎኖተ ሀሳሞ።

13 ህካን እኮቤቺሃ እን ኡሱረሞሚሁ መሲህተኔሃ እሁሰ ርሞ ዋሞ ሞኒ ዘበኛኑትለክ ዋሎ ህከኔ ዮ መኑ ጉዕመንኩ ደጋኦ።

* 1:1 ድያቆነ ሆጉት- ሞኒ እኑ ሬዮ ሜንቱ ካደሙሃን። 1:1 ሶቀ. 16፡12። 1:13 ሶቀ. 28፡30።

14 ቀርቾን አመዕንቶ አመኦሶች ልግቡስ ኢ ኡሱረሞተኔሃ ቀርቾን አመዕነንት መገን ላገተ ዋዕኔች በትስ ዋጅቱዕነ መለልት ዱዱብስታኢት።

15 እኩጎሬ መት-መቱ መኑ መሲህተኔሃ ዱዱብስታኢሁ አቁሻንትለከ ዋሉስ ጢቄኒት፤ ጠዉ እኩጎሬ ዋሉስ መኑ መሲህተኔሃ ጡመ ቀልቢን ዱዱብስታኢት።

16 እስ ተሸት ላገተ ፈየ ቀልቢን ዱዱብስታኢሁ ኢታች ኬዕዮሀኒንት፤ መሰንትስ እን ኡሱረሞሚሁ ተሸት ላገተ ሀንቂን ሰበኮተ አጸማምገ ደጋቤቺሃት።

17 ጠዉ እኩጎሬ አቁሻንለከ ጢቄን መሲህ ዱዱብስታኢሁ ሀንቂን እሁዕነ ገዉስ ኢቲንለከ ኡሱረሞኤ አሌን ዋልት ኦርሸተ በርግታኢሃ አጉጃሰቤቺሃት።

18 መሃ እኩጎሬ ሀካንስ እኩጎሬ ጉዕማንከ ዋቄን አመሰለን እኮ ሀንቂን እኮ እቃ መሲህተኔሃ ዱዱብስመኖቤቺሃ ሙንደአም።

19 ከኒች ኤተሪሃ ሙንደአም፤ መሰንትስ ክዕኔ ዱኢንለከ መሲህ ኢስ ጠሊላ እያኒ ሀዕለንሺን ዮኤ ኦርሻች ፋላምገ ደጎምቤቺሃት።

20 ሀካን እኮቤቺሃ መ ጠቂኒ ሙላምበእገ ዊሙ ሃሽኦቱትለከ ተብሶሁ ዮኤ፤ ጠዉ እኩጎሬ ጉዕመ ወክት አአምሀንገን ቱሁ ሄዕዮምጎሬ ህከረንገ ሬዮምጎሬ መሲህ ዊመ ጅሰምኤ አሌን ሎረ እሀኖገ ዊሙ መለሉ ዮኤ።

21 ሀካን እኮቤቺሃ ኢ ሄኡ መሲሂን ሄኡሃን፤ ሬሁተ እኩጎሬ ኤሳሃ ደግለለኖኤሃን።

22 ጠዉ እኩጎሬ ፎሊን ሄዕዮምጎሬ ላልቹ ዮስ ሆጉተ ቀርቺሃ አኦተ አታላም፤ እኩጎሬ ሬሆችለከ ሄኢች ሀካንስ መጠራም ጎር ደጎምበኢ።

23 ከን ለሞ ጠዋን ቀልቡኤ ለሙ ቤቹ እኮኡ፤ እሰን መቶ አዲን ከን ሄኢች አደ እክ መሲህን እሆተ ሀሳም፤ መሰንትስ ሁኩን ጉዕመርቺችን በተአኖሃ እኮቤቺሃት።

24 ጠዉ እኩጎሬ እን ሬሁዕነ ፎሊን ሄዕዮምጎሬ ክዕኔሃ በትሸ ጡመሃን።

25 እን ከ ጠወ አመዕንዮም፤ ሁኩንን ሙንዲኑክዕኔለከ አመዕነቱክዕኔ ነጻኖገ ሬሁዕነ ፎሊን ሄኢምገ ደጎም።

26 ሀካን እኮቤቺሃ እን ክዕኔኤን ለንኪሃ ደቀሞምጎር ኢ መሳን መሲህ ኢሳን ዮሀዕኔ ቦኑ አበ እሀኖ።

27 ጉዕሚችን በትሴን መሲህ እንጅሊሃ ሀሰሰኖገ ሄዕዬ፤ አሜች ለዕዮንክዕኔጎሬ ህከረንገ ክዕኔች ቄዕር ክዕኔተኔሃ ሞጮጮምጎሬ መቶ ቀልቢን እንጂል አመዕነትተኔሃ ሜጡበ እኬን አጸንቲነንተገ ደጋም።

28 ክዕኔተ ግባህዕኔረ መ ጠዋኒ ዋጅቶኖቹ፤ ኩንን እሳሃ በእስተ መላ፤ ጠዉ እኮጎሬ ክዕኔሃ ጡምተ መላ፤ ሁኩንን መገን አዲቺት።

29 መሰንትሰ መሲህን አመዕንቶኖተ ጠለዕል እሁዕን እስተኔሃ ኦርሸተ ቶጎኖተ ኩን እስሞህዕኔ።

30 ህካን እኮቤቺሃ አዕኑ ከኒቶ ብርተ አጸንሸኤ ለኤንታኦ፤ ቲሁ ኢ አጸንሸ ለኤንታት፤ አዕኑሁ ህትናሙ አጸንሸ አጸንቲንተ።

2

መሲህ ገዉስ ሆፍሾገ

1 መሲህን እኬንተቤቺሃ መት-መቱክዕኔ ሸዜነን ጠረኝቲንታኦ፤ ህትን እስ ኢታን ጠረኝጨቀንቲንተ፤ ህትን ጠሊሊ አያኒን ሜጡ እኬንታኦ፤ ህትን መት-መቲሃክዕኔ ጡምመትለከ ጎደበ ላፍመተ ለሊሴንታቶ።

2 ህካን ሰውቲን፥ ኢታንለከ ቀልብን ሙርሰጭቲን ሜጡ እኬን ሙንዲሲሴኤ።

3 ገዉ ኢቲን ህከረንገ ቦኒን መቱርቹ አቶኖቹ፤ ጠዉ እኮጎሬ ዋሉ መኑ ክዕኔቶ ቆሀኖገ ገዉ ሆፍሲን ዋለዕዩ፤

4 ህትን ገገዉክዕኔ ዋሉ መን መኩተ ሆሼ ቤሉ ገይክዕኔ መኩተ ጠለዕል ሀሶኖቹ።

5 ህትን ኩ መሲህ ኢሳን ዮ ሰውቱ ክዕኔ በላን ሄኡን።

6 እስ መገኑ እኮጎሬ

መገኒን ቅጡ አአኖ ሀል አፍ አገሮተ ሀሾበኦ

7 ጠዉ እኮጎሬ ሮሰ ደነ አፎ

መነ እኮ

ገውሰ ኦነ አዕዮ።

8 ገዉስ ሆፍሾ

ሬሆተ ኢሊ

መሰቀል አሌን ሰቀለም ሬሆተ ኢሊ

አዘዘሞ።

9 ህካን እኮቤቺሃ መገኑ ጉዕሚቶን አሌ ዋሽ

ኬዕምኝ ቤቶን አዕዮሰ፤

ጉዕመ ሱዕሚቶን ሎረ ሱዕመ አሌሰ።

10 ህካን እኮቤቺሃ ኢስ ሱዕም ኬዕምኝተኔሃ

ኡላን፥ ሰማንንለከ ኡሊ ኣዜን ዮሩ ጉዕመንኩ

ጉሉቤንከሰ ጉሉጽታኦ።

11 ህትን አረቤንከሰን

«መሲህ ኢስ ቀርቼሃን» ይት መስከርት
እነ መገኒሃ ኬዕምኝ አታኦ።

ዱንያ አል መኒሃ ኑሪ እህተኔሃ

12 ህካን እኮቤቺሃ ኢ ጃላ! ጉዕመ ወክት አዘዘንቴንተኤገን ክዕኔቤቺን ሄዕዮም ወክት ጠለዕል እሁዕነ በትሽን ቴሱ ክዕኔቺ ቁዕሪም ወክትሃ ጡሙክዕኔ ለሊሳ ሆጉተ ዋጅንለክ ሁጢን አዕዬ።

13 መስንትሰ እስ ጡመ ሰውት ሀሶኖተለክ አቶኖተ ክዕኔ ኣዜን አእኖሁ መገኑሃን።

14 ጉዕመንከ ሆጉተ አቴንተ ወክት ቁንቁቶኖቹ፤ ህትን ኦደኖቹ።

15 ህካን እኮቤቺሃ አዕኑ ከን ሂለ ክልቀት በላን ሆፍኛለክ ህንቁኖህዕኔርቹ ዮህዕኔበኢሃ ነጣኑተ መገን ኦሱተ እኬን ዱንያ አል መኒሃ ኑር እኬን ለሊሴነንተ።

16 ኩን እሀኖንኩ ሂኡ ደገመኖ ላገተ ሙርቶኑዕናን ጠርኝሲን አፊኒት፤ ከን ሃሌን ደጉዱኤ እኮ ሆጉኤ ተሰ እክ ፈቃበኢቤቺሃ መሲህ ፈንቀል አሜተኖ ወክት ድከኣም ሄእኖኤ ዩሃን።

17 አዕኑ መገኒሃ አመዕነቲን ሆንጠህሴንተ ክትምለክ ክድመ አሌን አኒሁ ዱንተኣኖ ክትምገ ሆንጠኮምጎሪ ክዕኔን ጉዕሚንከክዕኔ ሜጡበ ተሽ የኖኤ።

18 ህትን አዕኑሁ ኢንን ሜጡበ ሙንደኤነንተ።

ጠሞቱዎሴለክ ኤጳፍርዲቱሴ ክድመተ

19 ቀርቼ ኢስ ዬጎሪ ክዕኔተኔሃ ሞጮጮ ሙንደኦተ ጢሞትዎሴ ደዕል ክዕኔቤቹ ሶሆተ ተብሳሃ አኣም።

20 ክዕኔተኔሃ ጡመ ቀልቢን ሰውየን ሻዘኖሁ ጢሞትዎሴገ ዮኢሁ አዪሁ ዮበኦ።

21 ዎሉ ጉዕሙንኩ ገይሰ ጠው ቤሉ መሲህ ኢስ ሆጎተ ሰውይቶበኦ።

22 ጠዉ እኮጎሪ ጢሞትዎሴ ቤቱ አነሰ ካደመኖህንገን ኢን ሜጡበ እክ እንጂላ ካደሚንከሰለክ አመዕነንሽሰ መስከርሲሱሰ አዕኑሁ ደጌነንተ።

23 ኢ ጠዉ መ ደረጀተ ኢላኖ ጎሪ ለዕዮሚች ኤተሮን ጢሞትዎሴ ደዕል ክዕኔቤቹ ሶሆተ ተብሳሃ አኣም።

24 ህትን አን ገዉንኩእ ደዕል ክዕኔቤቹ አሜቶተ አታላምገ ቀርቼ ሀዕለኖኤገ አመዕናም።

25 ህትን ኤሳሃ ሀሲሰኖኤርቹን ጉዕሚን ሀዕሎኤተ ሶኬንተ አመኤቤቱ ኤጳፍርዲቱሴ ክዕኔቤቹ ሶሁ ሀሲሰኖሃ እክ ደጎም፤ እስ ኢን ሜጡበ ኑሪ ዎታደርቹለክ ሆጎኤ ጃላ እክ አኣን ዱንክዮሃን።

26 እሱ ክዕኔቤቹ ሶሃሚሁ ጉዕመንከክዕኔ ለኦተ ሱቕገለከ እሰ ጥዙሰ ሞጮጭቴንተቤቹሃ አበ ጨነቀሞኡ።

27 ሀንቅንከ እሰ አበ ጥቁር ሬሆተ ሆንጠኮ እቅ፤ ጠዉ እኩጎሬ መገኑ መረርሲጭ ፈይሾስ፤ ጠለዕል እሰ እሁዕነ ኤሳሃ መረርሲጭቤቹሃ ሻዙተ ሻዞ አሌን በርገመኖኤበእገ አዕዮ።

28 ህካን እኮቤቹሃ አዕኑ እሱ ለንኪሃ ለኤን ሙንደኦኖተለከ ኢ ጨነቀሙ ቢሎተ አን እሱ ክዕኔቤቹ ደዕል ሶሆተ አበ ሀሾሞ።

29 ቴሱ ቀርቶ ሱዕሚን አመዕናንቹ እኮቤቹሃ አበ ሙንደኖን ቶጌስ፤ ህትን እሰገ ዮ መነ ጉዕመንከ ከበጅዬስ።

30 መሰንትሰ አዕኑ ግደኖን ሄኤን አቶኖኤተ አታልቴንበ ሀዕለንሽ እሰ ደግለሎኤተ መሲህ ሆጎተ ነብሳሰ ህግሽ ኣሲን ሬሆተ ኢላ አጸሞኡ።

3

ሀንቅ ፈይመተ

1 አመኤ ኦሶ! ቀርቾን ሙንደዕዬ፤ አን ከኒች ብርተ ከተቦንክዕኔሃ ፈንቀሽ ከተቦንክዕኔ ጎሬሁ ህፈትሰኖኤበእ፤ ሁኩንን ክዕኔተ አደጊች ጉዕሚችን አገርህዕኔተ አታለፍ።

2 ዉሸገ* ንጃሰሳህኦችለከ ሂላ ጠዉ አታህኦች አገዕርዬ፤ ህትን ህለተ ሆጉተ አታህኦችለከ ክዝብ ጡርከመሚች አገዕርዬ።

3 ነኡ መገን ጠሊላ አያኒን ሰገንዳምረለከ መሲህ ኢሲን ድከዕናምረ እንኮምቤቹሃ ሀንቂን ጡርከመሞምረ፤ ጠዉ እኩጎሬ እሰ ህትናመተበእ።

4 ህትን አን ማሊን እኮ እቃ ድከኣሚሁ ዮኤ፤ አዪሁ ማሊን ድከኣኖሁ ዮሲሃ አጉጃሰእቃ አን ድከኣም ልግቡ ዋቆ ዮኤ።

5 አን እለሞም ህዜትቅ በር ጡርከመሞምዮ፤ ቢንያሜ ደቦች እኮም እሰራኤላውቹሃን፤ ከኒች ኬዕዮሀኒን ነጠ እኮም ዕብራውቹሃን፤ አይሁድ ሕገ አገዕሪን እኮ እቃ ፈርሳውቹሃን።

6 ሀይማኖትሃኤ ይ መሲህ ኢሳን አመዕንቶረ ሽራምሃ እቅ፤ ህትን ሙሰ ሕገ አገዕሪን ፈይተኔሃ እኮ እቃ ኩሌኖኤርቹ ዮኤበእ።

* 3:2 ዉሸተ፡- የኖሁ አይሁድ መኑ መገኑ አመዕንበ መነ «ዉሸተ» ይታቤቹሃት፤ ጠዉ እኩጎሬ ከንቤቸን ጳውሎስ «ዉሸተ የን ጠወአኖሁ «ነኤን አመዕናኖተ» ይተን ሃዕሮ አመዕንቶ መነ «ጡርከሙ ሀሲሰኖህዕኔ» ይተን ግደጃሳ አይሁድተኔሃት። 3:5 ሶቀ. 23፡6፤ 26፡5፤ ሮሜ 11፡1።

7 ጠዉ እኮጎሬ ከኒች ብርተ ኤሳሃ ደግለለኖኤ ዩሚሃ ጉዕመንከ መሲህተኔሃ ይ ተሰ ጠውገ አዕይ ዋለኣንሰ።

8 ጠለዕል ህካን እሁዕነ ቀርቹኤ መሲህ ኢሰ ደጉ ዋሎርቹች ጉዕሚችን በተአኖሃ እኮቤቹሃ ሁኩን ጉዕሙንኩ ክሳርገ ዋለኣንሰ፤ እስተኔሃ ጉዕመርቹንከ አጉርም፤ መሲሁ ደኣተ ጉዕመርቹንከ ቶሬመ ሁርገ ዋለኣም።

9 አን ሕገ አገሪን ደኣም ገይኤሃ እኮ ፈዩት ዮኤበኣ፤ መሲህ አመዕኒንለክ እሲን ሜጡበ እሂን ደገንታ ፈዩት መገን ቤቹች አሜታ ፈዩት ቴሱ ዮኤ።

10 አን መሲህ ደጎተለክ ሬሆች ኬእስ ዋልቀተ ደጎተ ሀሳም፤ አን እስ ኦርሸተ ቤቀሞተለክ ሬሆንከስ እሱ አጉደተ ሄዕላታም።

11 ህትን ሬሆች ኬኣምገ ተብሳሃ አኣም።

ኢሉ ሀሰሰኖቤቹ ኢሊሃ ደጉዱ

12 ህካን ጉዕመንከ ደእዮምበኣ፤ ህከረንገ መገኑ ሀሰኖ ሃሊን ሆሮ አን ዊማበኣ፤ ጠዉ እኮጎሬ መሲህ ኢሰ ኤሳሃ ገይሲሃ አዕዮኤቤቹሃ ሽልማት ደኣተ ብርተ ዋሽ ደጉዱ አጉራምበኣ።

13 አመኤ ኦሶ! አን ህካን ገይኤሃ አዕዮምሀንገ ዋለኣምበኣ፤ ጠዉ እኮጎሬ መቼ ጠወ አኣም፤ ሁኩንን ኤተርንከኤ ዮኢሃ ሀበን ብሬንከኤ ዮኢሃ አፎተ ደጉዳም።

14 መገኑ መሲህ ኢሰ አዲን ገኤኤሁ ሰሜች ደኣም ዋገ ዘማን ጉዕሚንከ ሄኡ ደኣተ ኢሉ ሀሰሰኖኤቤቹ ኢሎተ ደጉዳም።

15 ቴሱ አመዕነቲን ጠረኝኖምሩ ጉዕሙንኩ ካን አጉደኖ ሰውቱ ሄኦኔተ ሀሰሰኖ፤ አዕኑ አደ እኮ ሃሊን ሰውይቲንተ ጎሬ መገኑ በራሃ አዕይ ለሊሰኖህዕኔ።

16 ህካን እኮቤቹሃ ቴሱ ኢለ ደዕኖም ሀንቅ ጠረኝንሰ አንፎ።

17 አመኤ ኦሶ! ኤሳሃ አጉዳንነተረ እኬ፤ ነኡ ዋልሀሰ ሞሳልተ እንኮምገን ህካን አጉደን ሄኦረ አጥራመቲን ለዕዩ።

18 መሰንትሰ ከኒች ብርተ ልግብ ወክት ኩሎምገን ቲሁ ኦኣን ኩላንክዕኔ፤ ልግቡ ሙኮ ሄኣንከሰ መሲህ መስቀሊሃ ዲኒ እክ ሄኣገ አኣኖሰ።

19 እሳሃ ጎደቡሰ መገኑዋሰ፤ ሙልሲሰኖርቹ እሳሃ ኬዕምኝየሰ፤ ሰውቱሰ ዱንየ አልየ ጠወ፤ እስ ኤተሩሰ በኡሃ።

20 ጠዉ እኮጎሬ ኒ ባዱ ሰማሃን፤ ህከንቤቹች አሜተኖ ጡምሳንቹ ቀርቹኔ መሲህ ኢሰ አገርናሚት።

21 እስ ኒ ህከ ህንቀሞ ጅሰመኔ ዶር እስ ኬዕምኝ ጅሰመ ኣጉደናገ አአኖ፤ ህካን አአኖህ ጉዕሙንኩስ ገይሃስ ጠገመናገ አአኖ ዋልቃንተሲት።

4

መጨረሻ ሸዘነ ላገተ

1 አመኤ ኦሶ! ኢታንክዕኔሁለከ ሱናንክዕኔሩ ሙንዲኦኤ አከንተሩ ሆጎተኤ አክሊላ አከንተሩ ቴሱ ቀርቾን ጠረኝቴን ኡርዬ።

2 ኤዎድያለከ ሲንጢኪ ቀርቼን ሜጡ አከን ሄኦኖተኤ ጫንክዕኔ።

3 አት አመዕነንቶንት ሆጎኤ ጃለ! ከ ሜንቱ ሀዕልቶተ ኡጫንኬ፤ መሰንትሰ ኩ ሜንቱ ቀሌምንጦሴንለከ ሱዕሙስ ሄኦ መጻፋን ከተበሞ ሆጎ ጃላን ሜጡበ እንጂል ላገተ ኢልሶተ ደግለልቶኤረ።

4 ጉዕመንከ ወክት ቀርቾን ተሽ ዩንክዕኔ፤ ቴሁ ያንክዕኔ ተሽ ዩንክዕኔ።

5 ጡምመክዕኔ ጉዕመንከ መንቤቾን ለልቶኢተ እኩን፤ ቀርቼንኩ አሜቶተ ሆንጠኮኤ።

6 ሀሰሰኖህዕኔርቼሃ ጉዕሚንከ ሹኩሩ ዊሞ ዱኢን መገኑ ኡጭዬ ቤሉ መቶርቾን ሻዞኖቼ።

7 መን ኤንኬዕኔች ጉዕሚች ሎረ እኮ መገን ወገሬቱ መሲህ ኢሳን ዮንተቤቼሃ ቀልብክዕኔለከ ሰውትክዕኔ አገረኖህዕኔ።

8 መጨረሻንን አመኤ ኦሶ! ቀልቡክዕኔ ከኒች ጉዕሚችን በተአኖሃለከ ገለትጭሲሰኖ ጡመ ጠዊን ዊንቴንታረ እኬ፤ ሀንቅ እኮ ጠወ ጉዕመንከ፤ ኬዕምኝ ዮ ጠወ ጉዕመንከ፤ ሀቂቀተ እኮ ጠወ ጉዕመንከ፤ ነጠ እኮ ጠወ ጉዕመንከ፤ ኢቴኖ ጠውተኔሃ ጉዕሚንከለከ ሙንዲሲሰኖ ጠውተኔሃ ሰውይዬ፤

9 ኢች ተማርቴንታሃለከ ቶጌንታሃ፤ ሞጮጮቴንታሃለከ ለኤንታሃ ጉዕመንከ አዕዬ፤ ወገሬት መገኑንኩ ክዕኔን ሜጡበ አሀኖ።

ጳውሎስ ሶሃመሰ ሽልማትተኔሃ ገለትጨገ

10 ጠዉ እኮጎሬ ልግብ ወክቲች ኤተሮን ኦርሽኤተኔሃ ሰውዩ ጀመርቴንተቤቼሃ ቀርቾን አበ ሙንደአም፤ ወክት ደእቴንታበኦ ቤሉ አተኔሃ ሰውዩ አጉርቴንታበኦ።

11 ህት ያም ወክት ሆፈዕዮኤርቼሃ ሻዥበኦ፤ መሰንትሰ «ዮኤ ጌሱ ኤሳሃ አሀኖኤ» ዩ ተማርምቤቼሃ ዮኤሀጊን ሙንደአምሃን።

12 ህካን እኮቤቼሃ ደኡለከ ደኡ ሆጉ ደጋም፤ ጉዕመንከ ጠዊን ጉዕመ ወክት ዱቢን እኮ ጎሪን ደእን እኮ ደኡ ሆግን «ዮኤሀ አሀኖኤ» ዩ ሮሾም።

13 ዋልቀተ ኣሰኖኤ መሲሂን ጉዕመንከ አኦተ አታላም።

14 እኩጎሬ አዕኑ ኦርሽኤ ቤቀማኑተ እኬን ጡመ ጠወ አቴንታኤ።

15 ፍልጽሱሳን ዮንተ መኑ! ወኔችን ኬሽ እንጂል ላገተ ተማርሰን መቄዶን ባዲች ፋሎም ወክት ክዕኔ ቤሉ ዋሉ አመዕናኑት አሲንለክ ቶጊን ኤሳሃ ሀዕሉ ሆጉሰ አዕኑ ገጫክዕኔ ደጌነንተ።

16 ህትን ተሰሎንቄ ከተማን ሄዕዮም ወክት ሀሰሰኖኤርቹ ሶኬን ልግብ ወክት ሀዕልቴንታኤ።

17 እን ለኡ ሀሳሚሁ ከኒች ብርተ አቴንተሀኒች አበ ጡመ ሆጉት በርገንቶታት።

18 ኤሳሃ ሀሰሰኖለክ ሀሰሰኖሀኒች በትሽ እኮ ሽልማትክዕኔ ኤጳፍርድቱ አንጋች ቶጎም፤ ሁኩ ክዕኔ ሽልማቱ ጡመ አንጀነተ ዊሞ ክትምገ መገኑ ሙንዲሲሰኖሃለክ መገኑ ቶገኖሃን።

19 ህካን እኮቤቹሃ ኢ መገኑ ዳንጉ ዮበእ ቀባጦችሰ መሲህ ኢሰ አዲን ሀሰሰኖሀዕኔ ጠወ ጉዕመንከ በትሽ አሶሀዕኔ።

20 አናኔ መገኒሃ ዘላለሚሃ ኬዕምኙ እሁንሰ፤ አሚዕን።

መጨረሻ ወገሬት

21 መሲህ ኢሳን አመዕንቶ መኒሃ ጉዕሚንከ ወገሬት ኢልሼ፤ አን ሜጡበ ዮ አመኤ ኦሱት «ወገሬቱ» ይታህዕኔት።

22 ዋሉ አመዕናኑት ጉዕሙንኩ አደንከ ሮም ዋም ምኔን ካደንታ አመዕናኑንት «ወገሬቱ» ይታህዕኔት።

23 ቀርቾ መሲህ ኢሰ አሰቱት ጉዕሚንከክዕኔ ሜጡበ እኩን፤ አሚዕን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d